



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

Assam nung 'Mission Ramdhenu' tenzükogo

Haiti Tir Jovenel Moïse par kidang tepset



VOL. XVIII NO. 264 (ADOK 264) DIMAPUR

YANGTEPNÜ (THURSDAY)

CHITENI (JULY) 08, 2021

₹ 5.00

## AKM-i internet service yanglushitsü atema hopta ka züngzüksür

**Dimapur, July 7, 2021 (TYO):** Mokochung district nung aliba telecom service providers-i hopta ka tsungda internet services tajungba yanglushitsü metetdaksür, ta Ao Kaketshir Mungdang (AKM)-i tanü metetdaksüogo.

"Nübertemi telecom service providers dang kanga tezü atanger aser mekümdangra tesaatsü mapang ajurutsü akok saka iba atema AKM-i tebilemtsü khuret mabentsü," ta AKM Tir Nungdokyangar Ao aser Tongti Tezülur Nekmi Longkumer nati sangdong ka nung ashi.

Mokochung nung telecom service providers aser district administration-i nübertem timtemba angateta mapa inyaksü imlar, ta AKM-isa ashi.

Mokochung district nung tesüiba küm aika telecom service providers dang service tajungba kümdaksütsü shiyonga aruaka mapa meinyaker. Talisa, COVID-19 wara mapang internet service kanga majungba ajanga

tetsükdaksü aika ajurur, ta parnokisa metetdaksü.

Iba khuret atema AKM-i aiben telecom service providers den ajurutepogo aser parnoki nangzükaka tanü tashi internet services tajungba makümer. Internet connectivity majungba ajanga kaketshir aser tesayurtemi online class agiba nung timtem ajurur. Maneni, emails, online orders mesüra sorkar o nija office temi kulikakettem yokba inyakyim nung timtem ajurur, ta AKM-isa ashi.

Telecom service providers-i mapa inyaksü ta teimla nung AKM-i aremzüka ata aruogo aser onoki public danga 'technical' timtem kar aliba reprangshimdar aser iba sülen internet connectivity tajungba akümtsü ta shia aruogo. Ajisüaka, telecom service providers-i nangzükba ama mapa meinyak nung hopta ka tsungda internet services tajungba kümdaksütsü mapang latetsür, ta AKM-isa metetdaksüogo.

## Advisor Sukhalu-i DoSE nung recording studio lapoktsü

**Kohima, July 7, 2021 (TYO):** Nagaland nung online education system tajungba kümdaksütsü atema School Education Advisor, K. T. Sukhalu-i Bodbar nü Recording Studio ka lapoktsüogo.

Samagra Shiksha Nagaland-i sen teyari agüja Directorate of School Education nung Recording Studio yanglu.

"Iba studio nung teaching-learning materials yanglur state nung aliba kaketshir nem agütsütsü" ta Advisor Sukhalu-i ashi.

"COVID 19 wara ajanga asenoki tetsükdaksü aika ajurur anungji kaketshirtem, loktiliba aser public ajangzüksü asoshi asenoki lenmangtem bushitepsüla" ta paisa ashi.

Nagaland nung tesayurtem aser talisa sorkar tesayurtemi ki tonga oa tsüraburtem aser kaketshirtem den ajurutepsüla aser parnok nung online learning indang tebilembatem metetsüla, ta Advisor Sukhalu-isa metetdaksü.

"Department-i seniority list renemtsü atema graduate tesayurtemi tekaratiba nung verification osang agütsütsü

mepishir" ta paisa ashi.

"Graduate tesayurtemi osang magütsü tashi onoki seniority list meyanglutetsü aser iba ya mali nungbo promotion mapa meinyaktetsü" ta Sukhalu-isa shisem.

"School education department aser Nagaland atema tanü ya kanga dang tongtipang anogo ka lir. Studio nung recording asüba ajanga kaketshirtem ajangzüksütsü merangtsüla" ta Special Secretary, School Education and SCERT, Kevileno Angami-ia ashi.

"COVID 19 tensa ajanga timtem bentsür aruba asenok ajaki angatetsüla. Tsürabur, tesayur aser kaketshir ajaki iba ya angatetsüla aser asenok ket nung aliba facility tajungtiba amshitsü merangtsüla" ta Kevileno Angami-isa metetdaksü.

"COVID 19 tensa ajanga digital education system ya maneni inyaka aotsüsa akümtsü. Asenoki alima den liromedema anidaksüla aser iba ya studio yangluba ya temelenshi indang mera mezüngbuba südaksüdi" ta Principal Director, School Education, Shanavas C-ia ashi.

## Union Cabinet nung Minister tasen 36 aniokogo



Nirmala Sitharaman-i Twitter nung tetsür minister tem noksa ka lemsaba angur. "Minister Smriti Irani den tanü tezüngzüktep agiba minister tem angur. Abelen nung Darshana Jardosh, Pratima Bhoumik, Shobha Karandlaje, Bharti Pravin Pawar, Meenakshi Lekhi, Anupriya S Patel, Annapurna" ta Nirmala-ia ashi.

**New Delhi, July 7, 2021 (Agencies):** Prime Minister Narendra Modi-i Bodbar nü Union cabinet ulushiba nung minister tasen 36 aniokogo aser tongtipang minister 4-i mapa toktsüogo.

Tang PM Modi-i aniba Union cabinet nung minister 77 lir aser parnok tesadang ka tasen lir.

Union cabinet tasenba nung Cooperation Ministry nung minister inyaksü atema Amit Shah shimogo aser Prime Minister Narendra Modi-i Ministry of Science and Technology ketdangsüa

reprangtsü. Prime Minister Narendra Modi'er Cabinet nung minister 43-i tezüngzüktep agiogo.

"Tanü tezüngzüktep agir ajak nem tenüsang agütsür aser pei mapa takok ngua inyaka aotsü moatsür. Onoki maneni nübertem taginüba tongtsütsü aser India tashi itdaksütsü aser azükarutsü atema inyaksü" ta PM Modi-i ashi.

Tanü cabinet ulushiba mapa meinyakdang Union Minister 12-i sodi meshiba India President Ram Nath Kovind-i agizükogo.

Minister menden toktsürtemji Ravi Shankar Prasad, Thaawarchand Gehlot, Ramesh Pokhriyal 'Nishank', Harsh Vardhan, Prakash Javadekar, Sadananda Gowda, Santosh Kumar Gangwar, Babul Supriyo, Dhote Sanjay Shamrao, Rattan Lal Kataria, Pratap Chandra Sarangi aser Debasree Chaudhuri nung lir.

Asüng nikongdang 5:00 ako nung PM Modi-i council of minister tasen den senden ka amentsü jatepogo, ta osang ka ajanga ashi.

## Jenang atuba anema Congress-i anogo 10 lungkak aittsü

**Kohima, July 7, 2021 (TYO):** Linük nung totzü den tongtipang nüngdakba ajak nung jenjang atuba anema Bodbar nung Congress-i lungkak aitba sentong ka tenzükogo.

Tanü Nagaland Pradesh Congress Committee (NPCC) aser Kohima District Congress Committee (KDCC)-ia iba sentong tenzük.

Tanü Congress Bhavan, Kohima nung NPCC working president Khriedi Theunuo-i anogo 10 nü lungkak aitba sentong tenzüksü.

Congress-i posters, banners aser pamphlets den signature campaign ajanga iba sentong agütsü.

"Coronavirus wara agi timtemba mapang ka nung petrol aser diesel dena tang nüngdakba ajak nung jenjang atuba ajanga nübertem kanga timtemer" ta Theunuo-i ashi.

Nübertemi timtem ajuruba

angata aser süoki ia bilema iba sentong agir. Sorkari nübertem atema inyaktüba sernung tebilemtsü mabener, ta paisa ashi.

Kechisarena ajak nung jenjang atuba ya petroleum products nung jenjang atuba ajanga lir, ta Theunuo-isa metetdaksü.

"Petroleum jenjang atubaji international oil jenjang nung ajemdaker lir saka state sorkari tax tali agiba ajanga jenjang onsara kümogo. Nagaland nung diesel aser petrol jenjang tupet atur aser district ajak nung litre ka nung Rs 100 tongogo" ta NPCC working president-isa metetdaksü.

"Sorkari nübertem atema meinyaksür anungji national political party ka ama Congress-i nübertem asoshi ola adoktsü. Iba campaign ajanga nübertem nem osang tejangja sangoktsütsü aser onok den yaritepsü imlar" ta paisa ashi.

AICC-i signature campaign ya linük nung kilen crore 3 atongtsü

alizüing yua lir aser iba nung Nagaland dena lir, ta Theunuo-isa shisem.

"Congress volunteer temi Kohima nung petrol pumps aser tongtipang tesemtem nung posters aser banners yutsütsü" ta Kohima District Congress Committee president, Kevi Vizo-ia ashi.

"Assembly Constituency Congress Committee tashi nung signature campaign agütsü aser kilen shia sema senzütsü. Onokisa roadside campaigns ajanga public dang iba nung shilem agütsü mepishitsü" ta paisa ashi.

July 16 nung NPCC president K Therie-i anir Congress züngsemtemi Raj Bhavan Kohima nung oa Nagaland Governor nem memorandum ka agütsütsü, ta Vizo-isa metetdaksü.

Tanü agiba sentong nung mendenji NPCC general secretary (organization) Supongmeren Jamir liasü.

## Minister Kashiho-i Union minister Shekhawat den ajurutep

**Kohima, July 7, 2021 (TYO):** July 6, 2021 nung Nagaland Minister V. Kashiho Sangtam-i New Delhi nung Union Minister for Jal Shakti, Gajendra Singh Shekhawat den ajurutepogo.

Senden nung Soil & Water Conservation and Geology & Mining minister Kashiho-i Union Minister dang Nagaland nung tzüngluruwa mapang tzümetsüing timtem ajuruba osang metetdaksü.

Minister Kashiho-isa Union Minister Shekhawat dang tan financial year tsungda Nagaland nung tongtipang ayong asem merüktetsü ashiba Shekhawat-i reprangshimtsü nangzükogo.

## Covid putetaka meshirangertem pei kidang takdang balaka nung mongdaksür, idangji -



Pei alidak aser ayipdak mopong aittsüsa kichiba (window & ventilation) lapoka yuang. Akok tashi süngjanglijang aser süngolemba agi tua chiyongtsü tajung Chiang aser tzü aser juice jemang. Pei meyong mobile phone, kumesü aser toothbrush nung ama melentepa tamshi. Mozü achitsü agüja lira, aji shitak Chiang. Tango junga mesashitba, teku ashiba, aketba aser temang metaba timtem lira yakta doctor bushiang.



Tir Yimiyim

# Yimchungrü Tribal Complex semzükogo



**Dimapur, Chiteni/July 07 (TYO):** Mapang talangka nungi yongya ataba Yimchungrü Tribal Complex ya Shamator nung July 7, 2021 nü Commandant, 45 Assam Rifles, Col. Amit Thakur ajanga semzükja liasü.

Nüburtem asoshi iba amala ki yangluba atema pai

Yimchungrü Tribal Council (YTC) tir aser külem tenzükler aser züngsemtem dang pelaba lemsatepa liasü.

Paisa lenirtem ajungshi aser lokti tenzüktsü atema shisatsü tajung aser tapensa lenir nüngdaker, ta ashi.

Iba sentong nung YTC indang secretary, T. Solumba

menden liasü aser General Secretary YTC, Laji Luyanbah ajanga tarur pela agizüka jembji. Sentong nung ADC Shamator, Warren Holohon-ia o tatsüka jembia liasü aser xecutive Secretary, Yimchungrü Baptist Borü Amukhungto, Dr. S.J. Akhum ajanga iba ki meshiteta sarasademtsü.

# Governor aser Dy. CM ajanga Tuluni benjong salem lemsatep

**Dimapur, Chiteni/July 07 (TYO):** Sumi nunger adianu aser adianutsürtem aser Nagaland nung aliba nübura ajunga dangi Tuluni benjong salem abener, ta Nagaland Governor, R. N. Ravi ajanga sangdong ka nung ashi.

Küm nung ajak peria aser talubosa anguba mapang tenzükja Tuluni benjong ya amunger. Tuluni ya kinunger adianu aser lokti tesendaktep akangshiba mapang ka lir, ta ashi.

Iba Tuluni benjong ajanga

asen otsüla-oboula nungeri kati ka dak metaloka aliba bilemtetti. Tanü asenoki timtem ajurua aliba ajangshitsü asoshi Naga nunger yangertsü atema Sumi nunger lanurtemi maneni lungjemer inyaksü teimla lir, ta Governor Ravi-i ashi.

Asenok ajaki COVID-19 tashidak nungi jembua alitsü yimyatam amshia iba benjong mungti arungma, ta paisa ayongzükja liasü.

Dy. CM aser BLP leader Y. Patton-ia sangdong ka nung Sumi kin den Tuluni benjong

salem lemsatepa liasü.

Iba benjong nung lanur aser taintemi chia-jema benjongteper. Iba bejong ajanga nüburttem tsüngta telungjem adokdaksütsü aser tangatetep alitsü amanger, ta Patton-i ashi.

Paisa nüburttem dang COVID-19 SOP tem amshia benjong amungtsü ayongzükler, kechiaser lokti tulu adenshiba nung iba tashidak kanga kera menatepa aor, ta ashi.

BJP legislator tem tenüng nung Sumi kin dang Tuluni salem lemsateper, ta Y. Patton-i ashi.

# Security Forces temi telungpur kar apu



**Dimapur, Chiteni/July 07 (TYO):** Security Forces temi Police den lungjemer July 06, 2021 nü Dimapur district kübok general area Hoito village anasa operation ka agiba mapang NSCN (KN) züngsem ka pua liasü, ta osang ka ajanga ashi.

Osang tejangja kar nung ajemdaker Security Forces temi Police den lungjemer operation agiba mapang NSCN (KN) züngsem ka ya apu aser pa ket nungi 7.62 mm AK Rifles ka den magazine asem aser injang 54, 9 mm postol ka den magazine ana aser injang 18, point 22 rifle

indang magazine ka den injang ka aser Chinese grenade ka nguteta liasü.

Iba dak sendakba maparen maneni bushisüngdangtsü atema pua alisang den pa ket nungi ngutetba hadirtem ya Diphupar Police Station, Dimapur nem agütsüogo, ta ashi.

Maneni Security Forces temi State Police den lungjemer July 04, 2021 nü Phek district kübok general area Porba village anasa operation ka agiba mapang NSCN (K) indang züngsem ana aser NNC (NPGN) züngsem ka pua liasü,

ta kasa osang ajangasa ashi.

Osang tejangja ka angazükba nung ajemdaker general area Porba village, Phek anasa operation agiba mapang par asem ya apu aser parnok ket nungi .38 Revolver ka aser iba indang injang 12, AK-47 ka den injang 14 aser Bolero ka nguteta liasü.

Ken o maneni bushisüngdangtsü atema pua alirtem den parnok ket nungi ngutetba oset tem ya Pfutsero Police Station, Phek nem agütsüogo, ta osang ajanga ashi.

# Dimapur Police-i ozüngnung aibelenertem apu

**Dimapur, Chiteni/July 07 (TYO):** Diphupar nung July 3, 2021 nü dokan ka nungi jang auyar gari nung ajentsü merangba mapang iba gari ya lendong ajuruba sülen Dimapur Police-i arishi küm 20 tain Ikusa Aye aser arishi küm 30 tain Puloka Aye pua liasü, ta sangdong ka ajanga ashi.

Asüngdangyaba mapang pua alirtem yagi taoba mapanga kasa yimya amshia Diphupar, Chumoukedima aser Kuda village nung auyaa liasü, ta ashi.

Dokan nungi jang alitsü amai oa jembir dokan kibur teyari nung jang ya parnok indang gari nung inoktsü aser gari ya anir jena aotsü ta inyaka liasü, ta ashi. Iba maparen dak sendakba nung Diphupar Police Station aser East Police Station Dimapur nung ken o kaka zülüokogo.

Padumpkhuri area nung ozüng alema .22 caliber pistol ka aser injang asem bena aliba mechi Dimapur Police-i July 6, 2021 nü arishi küm 25 tain Torin Tikhir apu.

Osang ajanga ashiba agi, asüngdangyaba mapang pua alisang yagi par medemtsür ka puatsü mechi iba hadir ya nisung ka dang nungi khen atema meshia amshiba liasü ta ashi.

Iba dak sendakba nung ken o ka East Police Station Dimapur nung zülüokogo.

Maneni auyar aliba bike ka aser scooty ka Nagaon Police, Assam teyari nung Sub-Urban Police Station ajanga Nagaon, Assam nung July 6, 2021 nü nguteta liasü. Iba maparen dak sendakba nung ken o ka SBN PS Dimapur nung zülüokogo, ta sangdong ajanga ashi.

# July 9 nü Naturally Nagaland lapoktsü

**Dimapur, Chiteni/July 07 (TYO):** Agri Expo, Dimapur jakdang 4th Mile Dimapur nung Naturally Nagaland outlet ka Agriculture Production Commissioner, Nagaland, Kikheto Sema ajanga July 09, 2021 nü lapoktsütsü.

Joint secretary to the Government of Nagaland, S. Tainiu ajanga Agri & Allied department indang Administrative Heads of Department (AHOd) aser Heads of Department (HoD) ajak dang iba sentong nung arua adentsü metetdaksüogo.



Youth Alive Society Dimapur nung Chief Functionary, Sentikumla aser la den inyakeritemi July 6, 2021 nü Dimapur nung frontline workers nem 'refreshment' agüja liasü. Parnoki Dellai Gate nungi 5th Mile, Dimapur tashinung traffic police, frontline workers aser ano COVID Hospital Dimapur nung inyakeritemi takum bendanga agütsür nüburttem tenzükba atema tepela temaitsü sayua item achi-ajemtsü ya agüja jaja liasü.

# Noklak DPDB senden nung terenlok atema jembji

**Dimapur, Chiteni/July 07 (TYO):** Noklak District Planning and Development Board (DPDB) pur ita shia amenba senden ya July ita atema Deputy Commissioner, Noklak indang Conference Hall nung July 06, 2021 nü Advisor, Fisheries & Aquatic Resources, Evaluation, Economics & Statistics, L. Khumo mendenpuba sür mena liasü.

DPO Noklak, Imsumeren Jamir ajanga tarur pela agizükba o jembji aser pei sasa metetpelaba mapang agia liasü.

Iba senden nung parnok Nokhu circle nung RD block ka tentetsüba, Noklak Town leper leni aoba lenmang yanglushitsü, Taste of Noklak indang society registration, Nokyan yimdak Nokyan Village Guard Barrack yanglutsü atema jembia liasü.

Parnokisa Urban Development (a)Marketing complex (b) Urban Haat kübok Noklak town inoktsü, Assistant Commandant, VG' indang office ya Dy. Commandant jenjangi ajungkettsü, Thonoknyu

block atema Aspirational Block Committee ka tentetsü jembia liasü.

Senden nung CMO ajanga TB Mukta Bharat indang osang agütsü aser NITI Aayog nungi teyari mapatem inyaksü indang jembia liasü.

Item onük ya senden nung agizükba nüngdakba mapa inyaksü aser asadangtsü atema tim department dangi yoktsü lemteta liasü.

DIO Tuensang, Dr. Thungchanpeni Patton ajanga COVID-19 mozü agitsü kanga tongtipang ta senden nung adener aser nüburttem nem angatetdaksü aser sentong balala nung IRCS Noklak ajanga shilem agiba indang IRCS Secretary, Lachomong ajanga lemsatepa liasü.

Advisor Khumo aser Deputy Commissioner, Noklak, Reny Wilfred, IAS ajanga district tasenba, Noklak terenlok maparen atema süoki ia jembji aser pei department nung nüngdakba mesüra timtem ajurubatem sendeni bener arutsü ayongzükja liasü.

# Assam nung 'Mission Ramdhenu' tenzükogo



Bodbarnü Assam Health Minister Keshab Mahanta-i Mission Ramdhenu tenzüksüba noksa nung angur.

**Guwahati, July 7, 2021**

**(Agencies):** Bodbarnü Assam Health Minister Keshab Mahanta-i Mission Ramdhenu tenzüksüogo.

Guwahati nung aliba Mahendra Mohan Choudhury Hospital (MMCH) nung pai iba

scheme tenzüksü.

Iba scheme kübok arishi küm 2 der teküpok tanurtem aser mashisa tetsürtem nem vaccine agütsüsü.

Iba scheme kübok nisung lakh 1 tema vaccine agütsüsü. July, August aser September itatem

anogo 7 nungi 13 tashi parnok nem mozü agütsüsü, ta Health Minister Keshab Mahanta-i ashi.

Bodbarnü Medical College & Hospitals & Sub-Health Centers densema centres 4,741 nem vaccines agütsüogo, ta paisa metetdaksü.

# Tripura cabinet-i journalist atema welfare scheme 2 tenzüksü

**Agartala, July 7, 2021**

**(Agencies):** Tripura cabinet-i state nung journalist aser parnok kibongtem asoshi scheme ana tenzüksüogo.

Scheme anaji: "Tripura Journalists Sanman Pension Scheme 2021" aser "Journalists Paribar Suraksha Scheme 2021" lir.

"Taoba Left Front sorkari 2012 küm pension scheme ka tenzüksü aser ibaji Rs 1,000 liasü. Tripura nung BJP sorkar akümba sülen cabinet telemtetba

ka ajanga pension scheme ji yanglushi aser ita shia Rs 10,000 melen. Tang retired journalist pezüü iba pension scheme agidar" ta Tripura cabinet spokesperson & education minister Ratan Lal Nath-i ashi.

Council of ministers-i "Tripura Journalists Sanman Pension Scheme 2021" aser "Journalists Paribar Suraksha Scheme 2021" agizükogo. Iba ajanga journalist tem mapa nungi anenba sülen Rs 10,000 angutsü aser külen journalist

mapa teinyakdak nung tasüba ajurura, kinungertemi Rs 5,000 agizüksü, ta paisa metetdaksü.

Iba scheme ana atema application ji ICA department nung Director dangi yoktsüla, ta Minister Nath-isa ashi.

Chief Minister Biplab Kumar Deb-i anir state cabinet indang telemtetba pelashishia agizüker, ta Agartala Press Club secretary & Tripura Journalists' Union general secretary, Pranab Sarkar-i metetdaksüogo.

# Arrtsü den sendaktepa alir ajak adentsüla: Meghalaya Speaker

**Shillong, July 7, 2021**

**(Agencies):** Assam aser Meghalaya tsüingda arrtsü ken o angatetteptsü atema inyakba mapa nung sendaka alir ajak adentsüla ta Meghalaya Assembly Speaker Metbah Lyngdoh-i ashi.

Tawa Assam chief minister Himanta Biswa Sarma den

ajurutepdang iba tebilemba shiogo, ta Metbah Lyndoh-i ashi.

Tawa tu Assam chief minister Himanta Biswa Sarma aser Meghalaya Speaker Metbah Lyngdoh na Guwahati nung ajurutep aser idangji arrtsü dak sendakba onük aika jembitepa liasü.

"Northeast state tem tsüingda arrtsü ken o tem angatetteptsü atema ozü sorkari tongti süa inyaktsü" ta Assam CM Himanta-i ashi.

Northeast state tem tsüingda arrtsü ken o tem aliba ajanga asenok melongjemteter aser terenlok bener maruteter, paisa metetdaksü.

# Meghalaya & Assam nung menoknok anak

**Shillong, July 7, 2021**

**(Agencies):** Bodbar Tanü nikongdang 1:56 ako anüingdang Meghalaya kübok Garo Hills districts aser lower Assam nung menoknok ka anak.

Menoknok anakba tiyongtsüji North Garo Hills district nung liasü aser Richter

scale nung tashiji 3.7 liasü. nung menoknok anak aser Northeast kübok tesem aika anakshia liasü.

Tanep-a 5.2 tashi asadangba menoknok ka anak aser iba ya Assam aser Northeast kübok tesem kar nung meteta liasü.

# PM-KISAN ken o CBI nem bushisüingdang sädaksütsüla: AJP

**Guwahati, July 7, 2021**

**(Agencies):** Yaküm Assam nung PM-KISAN tim mesüi inyakba atema Central Bureau of Investigation (CBI) nem bushisüingdang sädakjang ta Assam Jatiya Parishad (AJP)-i takhangba agütsür.

Assam nung PM-KISAN (Pradhan Mantri Kisan Samman Nidhi) scheme kübok nisungtem (beneficiary) shimba nung tim mesüi inyak ta tai tonglokja lir.

Assam nung BJP-i aniba sorkari bushisüingdang asütsü tetuyuba magütsü, kechiyong beneficiary temji BJP aser Asom Gana Parishad (AGP) pusemertem liasü, ta AJP-i metetdaksü.

"Tai tongloksüba onüktem

atema sorkari mapa meinyak. Parnoki beneficiary masürtem dang sen meyipa agüjang ta shia iba ken o temdaksütsü meranger" ta AJP vice-president Someswar Singh-i ashi.

PM-KISAN scheme kübok aluyimertemi küm nung shilem asem lemsar Rs 6,000 angur.

Assam nung beneficiary lakh 40 rongnungi lakh 9.3 tema iba scheme kübok teyari mangutsüpurtem ta bushiteta lir.

"Onoki iba ken o ya CBI nem bushisüingdang sädaksütsü akhanger" ta AJP-isa ashi.

Külen, Congress-ia iba ken o CBI nem bushisüingdang sädaksütsü takhangba agütsüogo.



Mizoram kübok Lunglei district nungi Higher Secondary School Leaving Certificate (HSSLC) examination 2020-21 nung tajungtiba takok angur nem 23 Sector Assam Rifles-i tenüngsang agütsüdang agiba noksa angur. Assam Rifles-i tenüngsang agütsürtemji Vanlal Malsawmsanga, Noel VI Zikpui aser Ruth Lalruatfeli nunger lir.

# Moran National Liberation Front züingsem 7 temai adok

**Guwahati, July 7, 2021**

**(Agencies):** Tawa Moran National Liberation Front (MNLF) tentetba nung shilem agir nisung 7 temai adokogo.

"Parnok nisung tenet rongnung tanurtem dena lir," ta Assam Police Special DG, GP Singh-i ashi.

"Tinsukia Police-i mapa inyaka aruba ajanga Moran

National Liberation Front tenteter lanur tenet temai adokogo. Iba mapa nung DIG Doley aser SP Deuri nati shilem agiba atema tenüngsang agütsür" ta GP Singh-i metetdaksü.

"Parnok nem counseling agütsüsü aser nungdak süra ozüingi melaba ama inyaktsü" ta GP Singh-isa ashi.

# COVID-19: Manipur nung nisung 14 asü, 863 dak putet

**Imphal, July 7, 2021**

**(Agencies):** Manipur nung COVID-19 tensa tamajungba akümer. Mongulbarnü COVID-19 puteta alir nisung 14 tashi asü.

Parnok züingsema tasür ajak agi nisung 1218 kümogo. Külen, yashi nisung 863 dak COVID-19 putet.

Nisung 863 rongnung public 838 aser central paramilitary force nungi 25 lir. Parnok dena tang Manipur nung nisung 6231 anepaludar.

Tesüiba ghonda 24 tsüingda nisung 592 tashi taneptsü angu. Manipur nung taneptsü angurji 89.87% lir.



Bangladesh nung shisashir nisung 20 shi kati Tripura yimtiba Agartala nung 1971 Bangladesh liberation war nungshilung endokba atema tebilemtsü abenba metetdaksüogo. Parnoki India dang iba nungshilung raksaba anentsü aser Liberation War otsü magientsü mepishia shidi ka züluogo.



## TIR YIMYIM YIMOBILEM (EDITORIAL)

DIMAPUR YANGTEPNÜ, CHITENI (JULY) 08, 2021

### Kanga kümdangtsüba mapang

I ta ana asem tounüleni moutet aser teinyaknüsü meinyaktet kidang monga kazür, tang ya tanemi tanemi mokdanga aliba chiokba mapang lir, anungji aikati tashidak wara alibato amadoker akhi ama bilema kimaleni aoer aser shishilembadak sademsadema senzür. Asenok tashidak wara nungi kümzüksü asoshi tounüleni moudaktsü aser loktia mesentepdaktsü kidang mongdaktsü ser nung, asenoki asenok nem kari temerenshi agütsü amai bilemer, ibayongji mokdanga aliba salatsübaji tepoukdak puoka aliba chiok ama bilema asenok ajak khen nung kimaleni oteta adoka, kecha balaka nungdak mali ser nung pakzütep tenzükdagi. Ibaji pei asoshi dang masü saka ajak asoshi lendong lir. Noah mapang alima nung tzümetsüng aruba mapanga, tzü ajak arema lur külena Noah-i par kinunger anir rong temai oteta madok, saka tamasa waro yok aser iba sülen posü yok ta ka khen, ka khen ta yoker külenang ali nung senzütettsüsa kongogo ta kuli sütetba sülen dang rong nung jagi alu ta Lashiba nung shia aliba asenoki azünger. Ibaji mesüka kimalenji Covid tashidak ali asü maliar mejangja tashibo asenoka mashiibo malutsüla aser mesenzütsüla. Atangji, asenok ajaki kanga kümdanga aliba ajanga asen lima nungbo Covid-19 tashidak wara kanga ajema odagi aser shirangertema kanga ajema kümogo, ibayongji Covid mozü kidanga yipten tazüng aika anünga lir. Ajisüaka, idakji temulung lemer mashimashi alitsüla masü, ashiko, mozü kidangi aotsü tsübuba agi pei kidanga shirangertema aika alitsüa akok aser meshirangyonga Covid mesen temang nung bena alirtema aika alitsüa akok. Ano, tang kanga tekümdangtsü kaji küm 18 ser teküpbok tanurtem aika dak Covid-19 tashidak mesen aliba putetter. Aji oda, taintembo tashidak memenatsüsa ajem agir saka tanurtemjibo ajem magi ta asüba mapanga ya shingaia ashitsü makokba lendong mapangji asütsü. Tanga state-tem nung atalokbatem khen yutsür, tang ya asen kidanger Assam nung tanur meyirijang 36 dak tali dak Covid-19 tashidak mesen aliba puteta lir aser parnok rongnungji tanur 2,890 shirangdagi. Atangji, Assam nunga tamalen amatobo masü, Covid tashidak wara kanga ajema kümdagi saka parnoka tangsa tekümdanga kümdanga alir. Tang tangbo Assam aser Nagaland dang nungibo Covid tensaji Mizoram nung majungba lir. Idakjia yakanübo nisung 520 dak Covid tashidak mesen putetba nungi tanur 106 dena liasü. Aji oda, Mizoram nunga taintembo Covid mozüjem kanga junga agia odagi saka tebilemsü tulubaji tanurtem dak dena Covid putetbaji asütsü. Kasa shirangersa asüyong tain shirangbabo peisasa anepalutettsü, anungji kinungertema anasai marudaktsüi peisasa yaritettsü. Ajisüaka, tanurtem shirangbajibo tsüraburtemi yaritsüsa akümtsü, anungji tanurtemji ajungyonga ano taintemji shirangadoktsü aser ashiko taintemjibo majungtsüa akok. Atangji, Nagaland nunga tanurtem dak Covid putetba osang lir, saka tanga state-tem nung amajibo masü, anungji tang ya asenok asoshi kanga tekümdangtsü mapang lir. Mokdanga salarji ta ser tanurtem kima yimdongleni mashi maotsüla aser tensa mapang tajungba ka maru tashi mesüra kaketreju melapok tashibo pei kidangia medemertem mejaoktsüla aser tangar kidangia maotsüla. Iba kisüng jagi Covid tashidak wara ya tuluka nokdangtettsü. Tashidak wara indang shisadanger mongin nisung aikati Covid-19 wara mopong ya ano tangsa tesashiba arutsü amai shisabolua bilemer, kechiyong mokdanga salatsü dang ya nisungtemi Covid wara süitema ao ama bilema mashimashi jajatsü, idangji tashidak mesen ya menatempa oa kanga mejungi prokshitsü, idangjibo tanur tain ta mali, ajem magirtem dak temelaba atongtsü ta medical nung mongintemi asadangtetter. Atangji, ajem agiyonga mekümdangra tashidak menatsü, anungji ajem agir magir ajak kanga kümdanga alitsü mapangji tang ya lir. Ano, iba mapang ya nisung ajak asoshi Covid mozü jem agitsü mapang tajungtiba asütsü. Tashidak memenadangyongi nokdangtsüba ya tangar state-tem dang nungibo asenok asoshisa tongtibangba lir, kechiyong tangar state mozü ki o asenok mozü ki na balala, asenoki aji angatetra, tekümdang asüyonga ma ta asensasa asen kümdanger alitsü.

## OLEMSABANG

### KÜ PUNGMANG: AO AROGO YIMDEN YIMSÜSÜBA YANGLUSHITSÜ NÜNGDAK

~ Imli P. Lemtur (Jorhat)

#### Okila

Onükji züngra kanga tarok aser tulu lir saka ni asenok den iba onük asoshi kü pungmang (My dream of) kar dang lemsateptsü. Pungmangji teti nunga tasen aser tetsübutsüka asür aser ajak asoshi jangratemsübo masür. Iba amaji, kü pungmangjia kar asoshibo tasen aser tetsübutsüka masütsü akok, aser kar asoshibo tasen aser tetsübutsüa asütsü akok. Aji süaka pungmangba nung kecha tai mali. Shingaia nokdangtsü makok. Naia aika pungmangtsü akok.

#### Tang Teinyakdak Ao Arogo Yimden Yimsüsüba

ABAM kübok local Arogo 163 lir aser ABAM den affiliate masüba Arogo (fellowship) 9 lir. Arogo kar nungbo nüsüng merijang aika, saka kar nungbo noklangka shia tebüboka lir. ABAM nung Affiliate masüba Arogotemji pei Arogo tetsüti-i anepalur. 163 Arogo ajakji ABAM nung affiliate süa aliyonga, Arogo yimden yimsüsübajibo local Arogo dak tashi lir. ABAM nem ita shia tershilem nungi 5% agütsüba aser Special Sundays nung Onük kasa amshitsüba dak alaka, Arogo Yimden Yimsüsübajibo local Arogo mulung. **Tatishitsü agi,**

1. Arogo nung toklang tenzükerem shimbajia local Arogo tashi.
2. Toklang tenzüker mapa nungi anentsüba küm tasazükjia (retirement) local Arogo tashi.
3. Arogo tenyaba Mapa (Mission) aser Yimden Yimsüsüba (guideline/ administration) jia local Arogo tashi.
4. Toklang tenzüker tazüngba küli (qualification) jia local Arogo tashi.
5. Toklang tenzüker kasa tazüngba liaka local Arogo shia tenzüker Ita sen balala, ajia local Arogo tashi.

Ano aika lir. Iba inyakyim ya majung ta ashir masü, saka iba ama yimsüsütar ta jangjashitsürba lir.

#### Kü Pungmangtem:

Ao Arogo Yimden Yimsüsüba Yanglushitsü Nungdak nung kü pungmang kar lemsateper aser ibai Yanglushi Sensaksem Sabang (YSS) ajanga pungmang pungmangdaktsü nung kanga pelar.

#### \* ABAM aser Local Arogo Tesendaktep.

ABAM Vision 2030 (November 2016), tapak 26, second paragraph nung ashijaji, "Ao Arogo aser nüburttem tangatetba tajung kaji, mapang aser nungdak aika nung, 'Ao Mungdangi kechi ashir' ta asür" ta zülua lir. Tanü asen tendakbo ibaji tera melenshir amai nibo ajitetter. Mungdangji local Arogotemi repranger amai inyakyim nung sayur. Joko mungdangi kechi ashir ta masü, 'nenok Tsükongia kechi ashir?', mesüra, "town Arogotemia kechi ashir?" ta tangatetba nung aor amai angur. "Iba arogo tilaba to agia kechi ashir" ta tangatetba samaogo. Town nung alir tenzüker karibo budget magütsütsü ta amokmerenba tashi ajurua aruogo. Ita shia local Arogotemi Tershilem nungi 5% agütsüba, Mission envelop saruba aser ABAMWM/CED/YM/SS etc ajanga tongtipang anogo kar asoshi onük yokba dak alaka, ABAM ajanga lemtetta local Arogo yimden yimsüsüba nung liromedema inyakba tenyaba mapa aser yimsüsüba aika mali. Alima ajonga nung Baptist yimden yimsüsüba ka dang ta mangatettsüla; alima kar nungbo Baptist Bishop-a lir. Alima ajak nung pei lokti tentet dak apet Baptist Yimden Yimsüsüba lateta bener aobaji angutsü, saka Baptist Yimden Yimsüsüba nung Khrista dang tekolak aser Khristai mulungba nung ochi shia, amangba pur, talisa sensaker dang temeim sayuba kimong südaktsür tentetba arogoji Baptist ya lir, aser ibaji atalokdaktsütsü asoshi Local church autonomy saka ajak den tensendaktep nükjidong nung tenzük. Tanü local Arogo yimden yimsüsübatemji reprangdangra, joko local Arogotem ajak independent Arogo kümogo. Local Arogo yimden yimsüsüba ajak pei arogo den apet dang inyaker.

Anungji, ABAM kübok Arogotemi Yisu Khrista teyongtsü südaktsür ABAM lenisüba nung anidaktsü asü local Arogotemi lemtettsüba nung ABAMji anidaktsü ta khen khenbo bilemer. Talisa, town arogotem shirnok rongsen jenti aser tashitemeter, tuluur aika lir, parnoki kechi ashir ta melenogo. Ibai Ao arogotem ajaki tentetba Mungdang asoshi lendong asütsü. Local Arogo yimden yimsüsüba aser ABAM den tesendaktepji yamai dang ora, tarutsü putui yamai ashitsü ama bilemer, "ABAM kechi asoshi nokdaka lir." Ao Arogo ajak yimden ka nung liromedema anir aotsü asü mesüra rongsen aka arogo kar nem ABAM anishidaktsütsü? Tanü amai dang ora tarutsü putui iba tasüngdangba asüngdangtsü amai pungmanger.

#### \* Tanabuba Pungmang: ABAM aser Local Arogotem Tensendaktep Tasen

Jungjunga shisadangra, ABAM aser local Arogotemji, Arogotemi ita shia tershilem nungi 5% agütsüba ajanga dang sendaktepba lir (centralized) amai bilemer. Aser iba 5% agütsübaji ABAM taküm alitsü (survival) asoshi agütsüba amai angur, kechiaser iba 5% agütsüba dak alaka, ABAMi local Arogotem yimden yimsüsübaren liromedema inyaktsü asoshi latettsüba aika mali aser tashia lir mali ta bilemer. Tershilem nung 5% agütsüba ajanga dang sendaktepba masü saka Arogo yimden yimsüsüba lena sendakteptetra kanga ajungtsü amai pungmanger.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazüngerü angateta agitsü mepishir**

## Fairview Baptist Arogo nung Pastor, Stephen Jail nungi chiokogo



June ita nung police-i pastor, Tim Stephens apuba mapang tangokba noksa nung angur.

**July 07, 2021:** Taoba hopta Canada nunger pastor ka jail nungi chiokba sülen Amongnü (July 3) nü pai Arogo züngsemtem dang, pa tepuokdak aliba mapang nung alima nung Khristantemi pa atema sarasademtsüba ajanga pa tashi taitba kümogo, ta metetdaksü.

Calgary nung aliba Fairview Baptist Arogo nung pastor, Tim Stephens-i coronavirus tenokdangba anema inyakogo, ta aija pa den külemi pastor ana apuba sülen hopta ana lir July 1 nü jail nungi chiok.

Amongnü Tenla kidang Tsüngrem O jembidang Stephen-i, "Onok aonung 17 aser anogo 18 jail nung liasü. Mapang talangka yamaji alidang temelungjang nung aika bilemer, aser tang ibaji onoki

lemsatepner," ta ashi.

Stephens atema jembitsür Justice Centre for Constitutional Freedoms-i July 1 nü pastor chiokba osang metetdaksüba den külemi sorkari Fairview Baptist Arogo Tenla ki shibangja aliba lapoktsüba osang metetdaksü.

Tenla ki shibangtsüba ajanga Stephen aser par züngsemtem mimshia moapu nunga ang tekülem agia liasü. June ita nung helicopter nungi police-i mita senzüba mapang moapu ka nung par Arogopur tekülem sentong agia anguba sülen pastor pua liasü.

Justice Centre litigation director, Jay Cameron-i Alberta sorkari Stephens dang masü saka pastor ana densema apuba atema sorkar aitsü.

"Khristantemi tekülem agitsü

atema tesünep nung adenshi saka sorkari Khristantem anema inyakbaji onoki mamatsü," ta Cameron-i ashi.

Tenla kidang pastor Stephens-i Mathi tapu 10 nung ajemdaker sayutsüngi. Iba Lai nung Yisui Par nütsüngtem dang nenoki reshikangshi ajurutsü, ta shia lir.

"Kibur Yisui Khrista atema nokdakba atema nisungtemi nenok anema nokdaksü, ta Yisui ashi," ta pastor-i metetdaksü.

"Kü taküm nung nisung aikati ni sempaba ni tang ang ajangshiogo, ajisüaka khen nungi nisung aikati ni meimba ni kodanga mangjangshidang. Nisung tetsübu. Kilem kolak nungi Yisui Khristaji Chubatem madak Chuba, ta ayimdenang," ta pai ashi.

## Korea Arogoi India aser Myanmar na nem sen million 130 agütsü

**July 07, 2021:** South Korea nung aliba Arogoi Myanmar aser India na nem emergency relief atema sen million aika teyari agütsüogo; tang linük anaprongla nung coronavirus wara agi nisungtem kanga timtemdar.

South Korea yimtiba, Seoul nung aliba Arogo nung tongti putir, Benedictus Son Hee-song leniba nung linük ana nung timtemertem yaritsü atema tenla bendena liasü.

Arogoi India nem won sen million 80 aser Myanmar nem won sen million 50 agütsü; iba senji Caritas Korea-i Caritas India aser Cariitas Myanmar ajanga agütsü.

Iba senji ajanga India kübok Uttar Pradesh, Bihar aser Maharashtra state tem nung nisung 50,000 shi nem medical treatment agütsüba den külemi awareness agütsüba project balala nung amshitsü.

Tang India nung Coronavirus Delta variant ajanga tensa tamajungba akümba mapang ka nung South Korean Arogoi teyari agütsür. Taküm April ita nungi June ita

tom tashi nung India nung Khristan putirtem aser nun 520 dak tema süogo.

Myanmar nunga coronavirus wara agi timtemba den külemi lisopurtem aliba tesemtem nung sepai aser democracy pusemertem tsüngda raraba ajanga tensa mejungi lir.

Myanmar kübok Kayah state nung Catholic Khristan nütsüng jenti lir, aser South Korea Arogoi agütsüba tenla ajanga Kayah state yimtiba, Loikaw nung aliba Karuna Clinic aser St. Raphael nungi medical teams, nursing assistants aser volunteers nem medical oset balala den mozü agütsütsü, ta Korea Arogoi metetdaksü.

Southeast Asia nung aliba linük, Myanmar nung anogo shia coronavirus tashidak timba putetba dang masü iba tashidak agi nisung timba-timba südar. Tang tashi nung iba linük nung nisung 171,976 dak coronavirus putetogo aser iba tashidak agi shiranger 3,513 süogo.

Caritas (Karuna)

Myanmar-i Khristan nütsüng aika aliba state asem- Kayah, Chin aser Kachin states nung timtemertem yaria arudar aser South Korea Arogoi maneni parnok nungita tenla tulu agütsür.

Taoba ita nunga Seoul nung aliba Arogoi sen million 1 bendenteta sensaker linüktem nung global vaccine-sharing program atema tenla agütsüogo.

Taküm March ita nung Seoul nung putir, Andrew Yeom Soo-jung-i Myanmar nung timtemertem atema aria bilemstür, ta ashiba den külemi Myanmar nem emergency fund US sen 50,000 agütsütsü, ta nangzüka liasü.

Tang Myanmar nung coronavirus wave pezübuba den raraba den külemi kanga bulua menatepba Delta variant prokba mapang nung South Korea Arogoi parnok nem teyari agütsür. July 7 kija nunga Myanmar nung nisung 1,200 dak coronavirus putetogo.

South Korea nunga nisung 162,753 dak coronavirus putetogo aser iba tashidak agi shiranger 2,033 süogo.

## ANOGO ABEN TSÜNGREM DEN

### Kodanga mayatsü

*"Yisui parnok dang ashi, "Taküm chiyungtsü ni, shiba kü dangi arudir pa mayatsü, aser shibai kü dak amangdir pa kodanga metsüratsü."*

Yohan 6:35

Taküm alitsü asoshi chiyungtsü aser tajemtsü tzü nungdaker. Alima nung nisung aika chiyungtsü agi anünger aser chiyungtsü mangu aya agi asür. Victor Franki, Nazi nunger meyong con- centration camp nung liasü, tepuokdak alirtem asoshi tongtipangtiba onükji chiyungtsü liasü.

Amtsük pongu aser ango ana agi nisung meyrijang pongu chiyungdaksür külen ano teloki Yisui metoktsüi tesümgangtsü mapa inyakba aser angati anguba chiyungtsü yimla anidak, iba mapang Yisui Ni taküm chiyungtsü ta ashi. Manna koba temang asoshi tajung aser teyari

angur, iba tatishitsü amshia, Yisui Pa temangji tanela chiyungtsü ta ashi.

Nisung ajak dak Tsüngrem asoshi teyongyaba aser tzüraba lir, saka nisungi bushiba nung iba ya mangur. Saka Yisui ajanga dang angur. Lenmang adangji aser taküm ni lir. Yohan 14:6. Yisui asenok asoshi timtemseta asüba, shia aruba ajanga teti taküm alitsü aser kodanga mayatsü chiyungtsü Tsüngrem chir nem agütsür. Iba tanela chiyungtsü anogoshia- mapang ajak nung nungdaker. Kibong nung lokti nung, kija nung, tia ajak nung nungdaker. Tanü ne nem shibai taküm tasen agütsür bilemtetangma.

### SARASADEM

Yisui, Ne nung asanger, na kü tanela chiyungtsü, ni kodanga mayatsü. Amen

## China nung reshikangshiba Khristan kibong ka US tonga ogo

**July 07, 2021:** 2018 küm Taiwan-i jena ao aser yangji küm December 9 aonung Chinese Communist Party (CCP) Presbyterian Arogoi yaria Ren ketdangsertemi Early Rain Covenant Church (ERCC) mita Elementary schools nung oa liasü, aser iba mapang nungji züngdaksü.

Taiwan nung Jiawan teka nung 'fibroma' tashidak atema treatment agia liasü, treatment agiba mapang nung chemotherapy aiben agiogo. Tawa US nung aliba melungtet telok- ChinaAid aser Taiwan Association for China Human Rights na teyari ajanga tesüsa Ren'er kibong United States-i oa yangji jenokogo. Taoba ita- June 28 nü lar kibong Taiwan nungi tayimtsü ajanga apusoba sülen San Francisco atongba mapang nung ChinaAid Tir, Rev. Bob Fu-i parnok agizük.

Lar kibong Orlando, FL nung alitsü tebilemba lir. Ren'er kibong airport tonga aoba mapang nung parnok "Free Wang-Yi" ta ozülü sayua liasü. ERCC nung Pastor Wang Yi, 2018 küm December 14 nü apuba sülen küm 9 tashi tepuokdak ayutsü obendang 2019 küm Ren'er kibongi agüja liasü.

**OLONG PAITEP # 5868**

1			2		3		4		5	
6		7								
					8					
9				10						
						11				
			12							13
	14								15	
					16					
			17							
									18	
19										

- |   |  |                                      |  |
|---|--|--------------------------------------|--|
| <b>TIPILEN</b>  |  | <b>LANGTSÜNGLEN</b>                  |  |
| 2. Teburtemi tejak nung awaba - (8)                         |  | 1. Temejangdak - (6)                 |  |
| 6. T _ _ _ em - (3)   |  | 3. Nisung ka mapa inyaksü nübo - (4) |  |
| 8. Tzüak ayudak - (3)                                       |  | 4. Azüntsü asoshi mejemba - (6)      |  |
| 9. Nüngdakba dang timba - (6)                               |  | 5. Tesangwa agütsüba - (5)           |  |
| 11. Züina ao - (4)  |  | 7. Tila masü - (4)                   |  |
| 12. Yangi tzü angur - (5)                                   |  | 10. Tebenjem tetsür chanu - (4)      |  |
| 14. Tangar dang nungi tali - (4)                            |  | 11. Tekolak nung inok - (4)          |  |
| 16. Senyong masü - (6)                                      |  | 12. Tetsüngda - (6)                  |  |
| 17. Oadokdi - (3)   |  | 13. Tangar inyakba ka inyak - (6)    |  |
| 18. Tzü tarok - (3)   |  | 14. Tim masü ta ashi - (5)           |  |
| 19. Yimtaklir aikati iba ya ki den külemi yanglusemer - (8) |  | 15. Asalendong - (4)                 |  |
|   |  | 16. Tanü dangtsü - (4)               |  |

**OLONG PAITEP # 5867 TELANGZÜBA**

- |                                  |  |
|----------------------------------|--|
| <b>TIPILEN :</b>                 | <b>LANGTSÜNGLEN :</b>                  |
| 1. Tanga, 6. Wara, 7. Rajang,    | 2. Anga, 3. Yabang, 4. Tarok, 5. Orak, |
| 9. Anük, 10. Jenjang, 11. Alar,  | 8. Ainer, 9. Anema, 10. Jabili,        |
| 14. Ngashi, 15. Nala, 16. Mechi. | 11. Among, 12. Miim, 13. Anem.         |



**ODD ASER EVEN NUMBER AGI TIMTEMDAKTSÜBA**

**Sapang** : kechiba gari tajung yamai raksar?  
**Alok** : Medemsang, küna angatetteper raksar. Medemsang gariji even, pa shishi ao nung dokantemji odd anogo nungang lapoker, aser ni kü gariji bener shishi ao nung ni odd asünungji dokantemji even anogo nungang lapoktsüla, ta kanga gari agi timtemdaktsüba agi tetsüng agi dang jajatsü ta bangjemteber gari rongtokerba ati.

Lilir : I. Jamir

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiriyim@gmail.com nung yokang mesüra Tir Yimyim bureau tem nung agüjang.

**Tepela Tasoba Anogo**

Happy Birthday

- Tenüng : .....
- Tasoba anogo: .....
- Küm : ..... 4. Class : .....
- School : .....
- Talidak : .....
- Salem osang : .....

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Kettep**  
 (v) putepa aliba (matual love & cooperation)  
 \* Ozü kiyongertem kanga **kettepa** alir.

**Keptep**  
 (v) kati ka anema apusoba, tamajung nung toktepbpa (create enmity)  
 \* Akhidangbo yim o yim na kanga **keptep**.

**NAI-A YA METETTER MA?**

**ASSAM NUNG TEMOKTEMNÜBA TESEM KAR:**  
 (Yashi adok nungi...)  
**"Bogijuli Camp"** : Nameri Forest Reserve nung aliba camping site - Bogojuli Camp ya temoktemnüba tesem ta camp semdanger temi ashir. Tesemdanger temi iba Camp nung tebang agi rasa meshitetsüsa tetsüba tensa balala ataloka temoktemnüba osang metetdaksü. Iba Camp anasa alir lisopurtemi ashiba agi, aonung tantsür ka ajepba aser menüba ola angashi, saka iba tesem nung nisung shingaia kecha ngudanga mali. Ano, iba Camp semdanger temi aü (bamboo) terong laoba ola tulu angashiba otsü lemsatepogo, saka bushisüngdangba mapang iba camp nung aü terong laoeer aliba kecha mengutet.  
 (Maneni asüng adok nung...)

**TANÜBO NAI LANGZÜANG**

Q. Koba küm Autistic Pride Day mezüng munga liasü?  
 A. 2000      B. 2005      C. 2010      D. 2015

(Taruba adok nung onoki langzütüsü)

**YASHI ADOK TELANGZÜBA:** Paris

SUDOKU # 5908					TELANGZUBA # 5907												
2			5		9	7	2	5	8	4	3	7	6	1	9		
7	6	9			1		1	7	4	8	6	9	3	5	2		
3	1	5	7	2	9	8	4	9	3	6	2	1	5	7	4	8	
1			5	4	3		4	9	2	6	5	8	1	7	3		
	5		3	8			5	1	7	3	9	2	4	8	6		
6	8					1	6	8	3	1	7	4	2	9	5		
8	3	1	4	6	5		9	2	8	6	5	7	2	1	9	3	4
		4	9	8				7	2	9	5	4	3	8	6	1	
	2	6		7				3	4	1	9	8	6	5	2	7	

**OJANG LUTEP # 5453**

ISSHA :

LBUUA :

NTEADENA :

EMBILBA :

ANDG :

GIBNUNO :

OKRAKBA :

ADOSHIKBA :

TAGBJUNA :

ÜTSASÜ :

**OJANG LUTEP TELANGZÜBA # 5452**  
 ANEPDANG YAKTA SAAKA INYAKER TEMI RONGSEKETSÜNG ZÜINDAKTSÜBA NUNG SHILEM AGIR

**TAN HOPTA ATEMA - KOMA SÜLA ?**

Q. Nagaland nung Naga nungerbo kibong nung tanur ajema asotsü atema masü aika asotsüang ajungshitep nung koma süla ?

Olong 20 shi nung July 09, 2021 tashi nung iba telangzüba ya onok dangi (e-mail - tiriyim@gmail.com) :  
 (SMS - 9856121232 / 9436072422) : (WhatsApp - 7005723372 / 8729995804) : (tiriyim.in) ajanga yokang. Telangzübatemji taruba Honibarnü adoktsüsü.

### Petrol litre ka nung sen 100 ajungba atema sensotemi ola adoker



July 07, 2021 nü Delhi nung petrol litre ka nung sen 100 ajungba sülen NSUI züngsemtem Petroleum Minister, Dharmendra Pradhan'er kima adenshia longkak aitba mapang police-i apuba noksa nung angur.

**New Delhi, July 07 (Agencies):** Bodhbarnü Delhi densema yimti aika nung petrol totzü litre ka nung sen 100 akümba sülen nübur aikati twitter ajanga tejashi lemsatepogo.

Petrol litre ka nung sen 100 aser iba dak tema akümba sülen twitter ajanga nisung aikati asayamenü, kari tejashi lemsatep aser kari aoksaba lemsatepa liasü.

Talisa twitter nung #petrodieselpriehike aser #petrol100notout hashtag kanga amshidar.

2014 küm Lok Sabha election atema nüboyimba mapang nung Narendra Modi-i "acchhe din aayenge" (tajung

anogotem arutsü), ta nüburtem dang nangzükba dak sendakba nung nisung kati twitter ajanga "Kaash woh bure din he wapaa atay" (Tamajung anogotem tu ang meyipa arudaktsüner) ta ashi.

Nisung kati twitter ajanga, 1963 küm petrol litre ka nung poisa 72 dang asüba petrol cash bill noksa ka lemsatep aser aikati tweet ji lemsatepogo.

Bodhbarnüa petrol litre shia nung poisa 35 aser diesel litre nung poisa 23 tuogo. Iba sülen tang Delhi nung petrol litre ka nung sen 100.21 aser diesel litre ka nung sen 89.53 kümogo.

Mumbai, Chennai, Hyderabad aser Pune yimtitem nungbo petrol litre ka nung sen

100 dak tema kümer liasü. Bodhbarnü Kolkata nunga petrol litre ka nung sen 100 jungogo.

Nisung kati twitter ajanga, "Diesel aser petrol jenjang atuba manener. Anepdang shia yipten nungi saakdang iba osang dang azünger. Joko tanga osang mali amai bilemer. Election atong nung ang onok ama middle class nisungtem anisüngzük angutsü," ta ashi.

Bodhbarnü Ato kilonser Modi-i aniba Cabinet ulushiba anogo dak sendakba nung nisung kati, "Modi sorkari junga inyaketogo. Delhi nung petrol litre nung sen 100 ajunger aser iba atemaji benjungtepa Modi-i pai aniba Cabinet ulushir," ta ashi.

### Totzü jenjang atuba anema Puducherry aser UP nung Congress-i longkak ait

**Lucknow/Puducherry, July 07 (Agencies):** Linük nung petrol aser diesel jenjang maneni atuba anema Bodhbarnü Congress-i Uttar Pradesh nung longkak ait tenzükogo; tanü Congress züngsemtemi state tesem ajaklen Tehsil level nung longkak ait.

State yimtiba, Lucknow nunga state Mahila Congress Tir, Mamta Chaudhary leniba nung tetsürtemi auso temshia longkak ait.

Iba sentong nung jembidang Mamta Chaudhary-i, "Iba sorkar (BJP-i aniba NDA sorkar) marudang petrol jenjang kodanga sen 100 majung, tang LPG jenjanga sen 834 kümogo. Iba sorkari Ujjwala scheme kübok gas connections agütsü,

saka sensaker kati cooking gas atema sen baikaji komaser agütsütetsü," ta ashi.

Petrol, diesel aser LPG jenjang maneni atuba anema state balala nung Congress-i July 7 nungi tenzükba anogo ter nü longkak aittsü.

Longkak ait tembangba anogo- July 17 nü Uttar Pradesh nung Congress-i state assembly nung longak aittsü sentong renemdar.

Bodhbarnü Puducherry nunga taoba mapang Chief Minister aser Congress lenir, V Narayanasamy leniba nung Congress-i sorkar anema longkak aitogo.

Longkak aitba tesem tashi Narayanasamy-i cycle ajanga oa liasü. Longkak aiterem

rongnung Puducherry nungi MP, V Vaithialingam-a densema liasü.

Longkak aitertemi Centre sorkar dang, tang coronavirus wara ajanga nüburtem timtemba mapang nung totzü jenjang ya ajemtsüla, ta takhangba agütsü.

Longkak aitertemisa petrol pump nung totzü alirtem dang sorkari totzü jenjang atuba aija sign südaktsü aser sorkar anema yimyim ayima liasü.

East Coast Road nung aliba petrol pump ka nungbo Congress züngsemtem aser petrol pump nung inyaketem tsüngda rara adoka liasü, ajisüaka police-i nokdangba ajanga tensa tamajungba maküm.



Kolkata, July 07, 2021: Petrol aser diesel totzü jenjang atuba anema Bodhbarnü Kolkata nung TMC MLA ana- Becharam Manna aser Kalyan Ghosh na den party nung inyaketem cycle ajanga West Bengal Legislative assembly-i aoba noksa nung angur.

### India nung nisung 43,733 dak coronavirus putet aser 930 asü

**New Delhi, July 07 (Agencies):** Tesüiba anogo ka tsüngda India nung ano nisung 43,733 dak coronavirus putet aser iba tashidak agi shiranger 930 süogo, ta Bodhbarnep 8:00 ako nung Union health ministry-i metetdaktsü.

Tang tashi nung India nung coronavirus case ajak senteper 3,06,63,665 jungogo aser iba tashidak agi shiranger 4,04,211 süogo.

Tesüiba ghonda 24 tsüngda coronavirus agi shiranger 47,240 anepogo aser tang linük nung teshirangdakpur 4,59,920 dang kümogo, aser ibaji coronavirus caseload nungi shilem 1.5 dang lir, ta Health Ministry-i metetdaktsü.

Iba tashidak agi shiranger

shilem 97.18 (nisung 2,97,99,534) anepogo; tanü agi anogo 55buba anogo shia iba tashidak putetba dang nungibo shiranger anepba timba.

Tang linük nung hopta shia coronavirus positive putetba shilem 2.39 dang kümogo aser anogo shia positive putetba shilem-a 2.29 dang kümogo.

Tang tashi nung linük nung samples ajak senteper crore 42.33 dak tema tendangogo, ta Helath Ministry-i metetdaktsü.

Bodhbarnep Indian Council of Medical Research (ICMR)-i, tang tashi nung coronavirus samples ajak senteper 42,33,32,097 tendangogo aser iba nungji Mongolbarnü samples 19,07,216 tendangba densema lir, ta metetdaktsü.



July 07, 2021 nü New Delhi nung aliba LNJP hospital nung Delhi Chief Minister, Arvind Kejriwal-i coronavirus variants tendangba- COVID genome sequencing facility ka semzüksüba noksa nung angur.

### Modi-i aniba Cabinet ulushi; Health Minister menden nungi anen

**New Delhi, Chiteni/July 07 (Agencies):** Centre nung Narendra Modi-i aniba sorkar tanabuba kümsük nung tang mezüng Cabinet ulushia Union Minister aika menden nungi anen aser tejak tasenpur aika cabinet nung shimokogo.

Bodhbarnep Education Minister Ramesh Pokhriyal, Union Health Minister Harsh Vardhan aser Chemicals & Fertilisers Minister, D V Sadananda Gowda nung densema Union Minister aikati menden nungi anena liasü.

Labour Minister Santosh Gangwar, Minister of State for Education Sanjay Dhotre, Minister of State for Women & Child Development Debasree Chaudhuri, Minister of State for Health & Family Welfare, Ashwini Kumar Choubey aser Union Minister Babul Supriyo nungera minister menden nungi anenogo.

Union Health minister, Harsh Vardhan leniba nung linük nung coronavirus wara anema rarabayim nisung aikati aija liasü, aser tanep yakta pai Minister menden nungi anenogo, ta ketdangsertem osang ka ajanga metetdaktsü.

Cabinet tasenba nung Council of Ministers 43-i

nikongdang tenangzükba agiogo.

Harsh Vardhan ya medical doctor ka lir aser pa health ministry dang masü saka science & technology ministry-a repsema bena liasü.

Cabinet tasenba nung züngsem tasenpurtemji : Jyotiraditya Scindia, Narayan Rane, Sarbananda Sonowal, Anupriya Patel, Kapil Patil, Meenakshi Lekhi, Ajay Bhatt, Bhupender Yadav, Sunita Duggal, Pashupati Paras, Bharati Pawar, Ashwini Vaishnaw aser Shobha Karandlaje nung lir.

Minister menden nungi anenertemji: Ravi Shankar Prasad, Prakash Javadekar, Harsh Vardhan, Babul Supriyo, Ashwini Kumar Choubey, Ramesh Pokhriyal Nishank, Santosh Gangwar, Sanjay Dhotre, Debasree Chaudhuri, Ratan Lal Kataria, Sadananda Gowda, Thawarchand Gehlot, Pratap Sarangi, Rao Saheb, Dhanve Patil, Dhotre S Shamrao aser Pratap C Sarangi nung lir.

Temaba jenjangi ajungkertemji: Anurag Thakur, Parshottam Rupala, G Kishan Reddy, Kiren Rijju, Hardeep Singh Puri aser Manush Mandavya nung lir.



Key West, Florida nung Tropical Storm Elsa den mopung tesashi aser tzunglu meyokteper aruba mapang Green and Duval street ajanga nisungtem senzuba noksa nung angur. Southern Florida nung tsungsang tamajungba akumer, kong Tropical Storm Elsa agi Florida Keys nung kongshia ki ka jirepba nung takum jenburtem bushitsü tasakba kumdaksür.

## Russia nung tayimtsü tsükokdak nungi tasümang 9 ngutetogo

**Moscow, Chiteni/July 07 (Agencies):**

Russia anüdoklen Kamchatka Peninsula nung nisung 28 mener tayimtsü ka tsükokba sülen ketdangsürtemi nisung toku tasümang ngutetogo.

Antonov An-26 twin-engined turboprop tayimtsü ya 1982 nungi amshia aru, koba Kamchatka indang yimti tuluba, Petropavlovsk-Kamchatsky nungi tzükumlen aliba Palana jilai Mongulbarnü aoba mapang sama, aser tsungsang majung anentsü merangba mapang tsükok, ta ashir.

Tayimtsü nung mena alir nisung ajak ya süoki ta züingshir.

Tayimtsü ya samar ghonda ishika lir search team temi Palana anasa tzükum nung aliba longren aser Sea of Okhotsk nung tayimtsü teraksa oset kar ngutet.

"Tang nisung temang toku nguteta lir, aser tasümang ka jangjatetogo," ta emergencies ministry indang regional branch ajanga Bodhbarnü sangdong ka nung ashi.

Iba tayimtsü nung tanur ana densema passenger 22 aser tayimtsü ketdangsür trok liasü. Passenger tem rongnung Palana nung aliba sorkar tekolakba, Olga Mokhireva dena liasü, ta Kamchatka sorkari ashi.

Nisung 50 dak temai Okhotsk Sea tzükumlen nisung samar aliba bushir, saka tzüsü, mopung sashia aonba aser tzüsem adokba ajanga tetsükdaksü ajurur.

Russia indang emergencies ministry ajanga lendong atalokba tesemi tzüshir aser Mi-8 helicopter yoktsü sentong lir, ta ashi.

Kamchatka nung ketdangsürtemi lendong

atalokba sülen anogo asem mangyimtsü sangdongogo.

Asür kinunger nem sen rubles million 3.5 (\$47,200 shi) agütsütsü aser yangji airlines nungi teyari aser insurance aser regional sorkar nungi subsidy ka dena lir, ta ketdangsürtemi ashi.

Iba tayimtsü ya Kamchatka Aviation Enterprise company meyong liasü, koba junga dang amshia liasü aser safety check tem ajak ajangteter liasü.

Tsungsang majungba, technical tsütsü mapa shidak meinyakba mestüra pilot temi aibelenba ajanga lendong ya ajurua alitsü südi, ta Russia indang Investigative Committee ajanga ashir.

Russia nung aviation safety standards tajungba kuma renlokogo saka tesem tezülen tayimtsü tejen densema lendong ajuruba ya tang tasen masü.

## Haiti Tir Jovenel Moïse par kidang tepset

**Port-au-Prince, Chiteni/July 07 (Agencies):** Haiti Tir Jovenel Moïse ya linük yimtibanung par kidang lia tepset, ta linük indang interim prime minister ajanga ashi.

Port-au-Prince nung Tir Moïse'er ki ya mejangjaba nisungtemi prangbong bener arua Bodhbar aonung 1:00 ako (par mapang) nung amak.

Pa kinungtsü First Lady Martine Moïse-a iba lendong nung yiru.

Sorkar inyaksangshi ajanga thina atatsü mera ajak agiogo, ta Joseph-i ashi.

Nisung meimchir molungsentüsü agi magizüktetba mapa tamajung inyakba nung tir dak kanga mejungi akha, ta pai ashi aser nüburttem dang süngjema alitsü ayongzük.

Haiti tir menden nungi Michel Martelly aluba sülen arishi küm 53 tain Jovenel Moïse ya tir ka ama 2017 küm February ita nungi inyaka arur.

Moïse tir inyakba mapang mangatetep jenti liasü, kechiaser pai ochimashi mapa inyak, ta tai tonglokja liasü aser aiben sorkar anema azüdokshia longkak aitba ajangshia aru.

Nüburttemi pa dang tir menden yujang ta takhangba agüja küm tetenzüklen linük yimtiba aser danga yimitem nung longkak aita liasü.

Martelly menden nungi alur küm pongu ajungba anogo, February 7, 2021 nü Moïse indang küm pongu kümsük tembanger, ta Haiti opposition temi shia liasü.

Ajisüaka Moïse-i pa ano küm ka tenzüktsü lir, kechiaser



Jovenel Moïse

February 7, 2017 tashi pa tir menden nung mamen liasü, ta ashi.

Haiti election nung ashikülak mapa inyak ta tai tonglokja küm ka menudaksü aser 2015 küm election agiba ya tazüngla kumdakja election tasen agishi, kong Moïse-i takok ngua liasü.

Pa den tokteper temi pa indang kümsük tembanger ta ashiba anogo, February 7 nü mitkartem tashi amshia pa indang sorkar atsüngdoktsü merangba aser pa tepsettsü merangba nung tamakok ajuru, ta Moïse-i shia liasü.

Tensa majungba, nisung ka kijai yimsü asüba aser alimar yimya agi lendong balala bener arutsüba ajanga America nung Haiti ya tesensaktiba linük ka kumdaksü.

Haiti nung 2010 küm menoknok anoka nisung 200,000 dak tema takum sama aser ki-o-jen kanga mejungi raksa rongsenketsüing jenjang tamajungba akumer.

Linük tensa aziöktsü mechi UN peacekeeping force 2004 küm yok, saka 2017 küm ainshia liasü.

## Afghanistan sepaitem arrtsü alema ajener; Taliban tashi tuluba akümer

**Dushanbe, Chiteni/July 07 (Agencies):**

Taliban telok dang nungi jena aodang Tajikistan linüki aiba Afghan sepai 300 jungnüa Bodhbarnep tayimtsü nungi kidangi yokogo, ta Tajik security osang ajanga ashi.

Afghanistan north tsütsü Taliban telok tashi itshia akumba nungi Afghan sepaitem jena aodang aika Tajik-Afghan arrtsü alema ao. Küm 20 shi raraba sülen bendanger sepaitem linük yutsür kidangi aoba mapang Afghanistan nung tensa tamajungba akumer.

Kabul sorkari tayimtsü kar Kulob airport-i yok aser item tayimtsü nung sepai 280 mener aonungsa apuso, ta Tajik security osang ka ajanga ashi. Sepai ano 300 dak tema par linüki meyipa aotsü lir, ta osang ajangasa ashi.

Arrtsü alema Afghan sepaitem aruba atema Tajikistan-i khuret lemsatapa liasü aser arrtsü anütsü atema sepai 20,000 shi yoksemer, ta shia liasü. Kasa mapang Russia-ia par den yariteptsü shia lir.

Kasa mapang Taliban telok Afghanistan anüolen tongtipang yimti kati yiogo, shirnok NATO sepaitem linük nungi mainshi tsüngta arrtsanga linük tesem balala agitsü meranger.

Badghis province yimtiba, Qala-e Naw nungi sorkar ketdangsür ajanga anasa aliba mitkar amenoka alidak anidena lir, ta yangji governor-i ashi.

Telungpur ya yimti tiyongleni arua liasü aser sorkar meyong sepaitem den kanga sashia khatep, ta pai ashi.

Küm 20 sülen US, UK aser allies tem Afghanistan yutsür aoba mapang Taliban teloki linük tesem aika agiyonga aor.

Afghanistan nungi bendanger sepaitem September 11 tashinung ainshitsü anogo lateta liaka timba omaogo, aser linük security atema Afghan mitkartem kisüing akumer.

Taliban telok ya Qala-e Naw nung aliba tepuokdak kati oa par züngsem 100 dak tema densema yangji alir nisung 400 shi chiokogo, ta yangji alirtem osang ka ajanga ashi.

Iba tepuokdak tesem nüka aliba Afghan sepaitemi parnok den merarai bendanga agütsü ta angazüker.

Governor Hisamudin Shams-i ashiba agi, pa alidak Qala-e Naw district nung pai Taliban tem nguogo aser intelligence service indang headquarter nung mi senlokja rongdokogo.

Saka pai iba yimti ya Taliban küboki mait aser Afghan sepaitemi nokdangtsü meranger, ta ashi.

Tawa Taliban teloki district ter dak tema rakzükogo aser tang par kübok linük shilem asem shi lir. Provincial capital tembo tang tashi sorkar kübok lir.

Taliban den tezüngzüktep agiba kübok US aser par NATO sepaitem ya Afghanistan nungi anizüker aotsü aser iba melen Taliban teloki yimsü asüba tesem nung tashiyim mapa inyaksü memelatsü, ta shia renema lir. Saka Taliban-i Afghan sepaitem den raraba anentsü memolung.

Afghan sepaitemi telungpur nungi nüburttem aser linük

kumzuka ayutsü ya temolung malemer.

Telungpur temi tesem agitsü merangba mapang meranga nokdaksü atema Kabul nung aliba mitkar ketdangsürtemi jemb, saka tongpang nung aliba lenirtemi injang agi anünga lir aser teyarir yoksema nung mapang kanga agia menudaksür, ta ashir.

Telungpur azüöktsü asoshi Afghan security forces dak tashi sadema lir, ta Tir Ashraf Ghani-i nenshia ashir, saka tawa Afghan sepai 1,000 dak tema kidanger linük, Tajikistan nung jenoka liasü, aser ano sepai aika rara nungi jena oa Pakistan aser Uzbekistan nung jenoka lir, ta ashir.

Tawa azüdokshi tali akumba ya par telok mapa masü, ta Taliban odongtar Suhail Shaheen-i hopta tetenzüklen osangbener dang shia liasü. Afghan sepaitemi raratsü memolungba sülen district aika Taliban küboki aitogo, ta pai ashi.

Afghanistan nung aliba

nüburttem asoshi tang ya shisabulu mapang ka lir. Meimchir temeden aser sobaliba tsütsü tashiyim agi temeden agienba nung Taliban dak tai tonglokja lir, shirnoki nisung tepsetba maparen nung aitsür yimjak nung tepseter, television, ken aser cinema nokdang, aser tetsür arishi küm ter tema school-i aoba magizüker.

US-i aniba sepaitemi Afghanistan nung Taliban teloki yimsü süa aliba 2001 küm atsüngdok. 2001 küm September 11 nü lendong agütsüba nung sendaktepa alir Osama Bin Laden aser danga al-Qaeda lenirtem Taliban ajanga miimbanga yua liasü.

Taliban-i 2018 küm nungi tenzuka US den indang-indanga jembishinü tenzük, aser bendanger jihadist temi anüolen linüktem anema mapa tamajung inyaksü asoshi Afghanistan ya mamshitetsüsa US sepaitemi inyaktetogo, ta Tir Joe Biden-i ashi. Ajisüaka aikati yangji temolung malemer.

## Nüngtugu actor tejen Dilip Kumar arishi küm 98 nung süogo



"Dilip Sahib dang tatem maka taochi sayuba atema Tsüngrem tenüing asanger aser pa health tajungba kumdar. Onok mozükidang lir aser nenok sarasadem maneni akhanger, ajita asünungdang pa temang tajungba küma yakta kidangi otettsü. Saira Banu Khan (sic)," ta Dilip Kumar indang official handle ajanga lai tweet asü.

Hindi cinema nung actor tejen ya June ita tangola mesapoine akümba sülen Hinduja Hospital-i anir ao. Iba mapang nung Kumar bilateral pleural effusion agi kangshiba potet aser pleural aspiration procedure ka kanga takok ngua agi. Pa anogo pongu lir mozüki nungi yok.

**Chiteni/July 7, 2021 (Agencies):** Bollywood nung nüngtugu actor tejen Dilip Kumar süogo. Pa arishi küm 98 liasü.

Dilip Kumar ya taoba hopta suburban Khar nung amenoker aliba Hinduja Hospital-i temang anepalutsü anir ao. Pa kasa mozüki nungi temang anepalur yokba sülen anogo ishika dang lir temang mejungi akümba ajanga tanaben meyipa anir oa liasü.

Dilip Kumar'er kinungertem tembar Faisal Farooqui-i actor indang official Twitter account nung pa asüba osang jangshija liasü. "Temulung ajak korema

Dilip Saab minute ishika tejakdang asüba osang lemsateper. Tsüngrem nungi asenok aru aser pa dangi meyipa aoer," ta pai tweet asü.

"Pa mapang talangka shiranga lir tanep 7:30 ako nung süogo," ta Kumar anepaluba doctor Dr Jalil Parkar-i PTI dang ashi. Dilip Kumar den asüpila sentong Bodhbarnü nikongtsüsü 5:00 ako nung agir Juhu leper nung remtsüogo.

Hombarnü pa kinungtsü Saira Banu-i, pa temang tajungba kumdar aser yakta kidangi meyipa arutsü akok ta ashi. Laisa Twitter ajanga pa health indang metetdakja liasü.

Kumar-i küm tenem shi film balala nung shilem agiogo. Pai Mughal-e-Azam", "Devdas", "Naya Daur", aser "Ram Aur Shyam" amala nüngtugu film tem nung shilem agia liasü. Pai tatamsa 1998 küm Qila film nung shilem agia liasü. Kumar nem 1994 küm Dadasaheb Phalke award agütsü aser 2015 küm Indian cinema nem teyari tulu agütsüba atema Padma Vibhushan naroküm agütsü.

Pakistan sorkaria pa nem 1997 küm civilian nem agütsüba tetushi tematiba Nishan-e-Imtiaz agüja liasü.

## Nokia G20 India nung jelia mekazüka ayu tenzükogo

**Chiteni/July 7, 2021 (Agencies):** India nung Nokia G20 phone Amazon aser Nokia India site ajanga jelia mekazüka ayu tenzükogo. Iba phone ya jenjang dalang agi sayaogo aser India nung 4GB RAM + 64GB storage model ya sen 12,990 agi angutsü.

Iba smartphone ya India nung July 15 nungi tenzükoga Amazon aser tanga partner channels tem ajanga angutsü. Temetetsükaji e-commerce yagi sen 11,100 alang exchange offer amala sale deals balala agütsüdar. Maneni Amazon Pay ICICI Bank credit card amshia phone alira 5% tashi offer agütsü aser bank cards ka atema no-cost EMI

payment agütsüsü. Amazon Smartphone Upgrade Sales nung shilem ka ama SBI customers nem phone aliba mapang sen 750 agi tajemba nung agütsüsü.

Nokia G20 ya shishilembadak Redmi Note 10, Realme Narzo 30 4G, Poco M3 Pro 5G nung amal phone den tokteptsü. Iba phone ya Night aser Glacier sentsü nung angutsü.

Specifications dak sendakba nung Nokia G20 nung 6.5-inch HD+ display den waterdrop notch aser 20:9 aspect ratio keta lir. Phone telung nung MediaTek Helio G25 SoC, den 4GB RAM inokja lir. Onboard storage ya microSD card ka

amshia maneni atsülanga amshitetsü.

Nokia G20 nung tejaklen 8-megapixel camera ka inokja lir. Iba phone nung OS-ji Android 11 out-of-the-box asütsü aser küm ana tashi Android upgrades angutsü. Tanga tongtibang feature tem rongnung Wi-Fi, 4G, Bluetooth v5, GPS, NFC, 3.5mmm headphone jack ka aser phone tezülen fingerprint scanner ka inokja lir.

Maneni Phone nung 5,050mAh battery ka keta lir aser USB Type-C port ka ajanga 10W charging support asütsü. Tatamsa Nokia G20 tozük ya gram 197 asütsü aser dust aser water-resistant atema IPX2 rating lir.



India nüjiso ngur küm 75 ajungba nüngtem nung "Azadi Ka Amrit Mahotsav" (1st July - 14th August 2021) sentong kübok Public Health Engineering (PHED) department Wokha-i July 6 nü nungi calendar nung aliba inyakyim tem tenzükogo. Executive Engineer, Wokha, Er. Imnazulu Ao-i anir Department-i office kima aser Etsutchukha (Wokha jila water source tongtiba) nung süngtong temtsüba den merekmeju sentong ayongzüka agiogo. Nüburtem nem tzü temerek ajemtsü koda tongtibang, iba indang tangazükba agütsüsü atema water source merkettsü aser iba temeket nung süngtong temtsüsü Department nukjidong liasü.

## Pelaba Lemsateper

Onoki teti meima aliba **Asür Alemzungba Jamir**, akümlir wadang tembangba anogo nungi tanü tashi shirnokisa nübo, rongsen aser sarasadem agi yaritepogo, nenok ajak dang kanga pelaba lemsateper.

Nenok teyaritep tulu asoshi Tsüngremi maneni moajang ta ozüi sarasademtsür.

Onoki talisa item dang pelaba shisemer :-

1. Chuchuyimlang Senso Telongjem, Mkg
2. Riongsanger 3 Buba Sungpo Zünga, Mkg
3. Riongsanger 4 Buba Sungpo Zünga, Mkg
4. Alempang Ward yimden
5. Pastor aser Alemapng Baptist Arogo
6. Ashibortem



Temeim Kinungtsü, chirnur aser kinungertem

### Office of the Longsalong Cultural Club

Hq. Mokokchung: Nagaland

Regd. No. H/RS-211.Dt.20-04-1999

### KONANG TETUSHI AGÜTSÜR

Longsa yimtiba nungi asür Jongshitemjen jabaso Wb.J.Rongsennungba Jamir, takotet kenshi oshir, sobaliba kenten menu aser yar tsüngsang nung mongin, pa sempet tajung ajiteta, Ministry of Culture, Govt. of India ajanga "TRADITIONAL FOLK SONG & DANCE" nung Guru agütsüba osang angashia LCC office ajanga pelaba den konang tetushi agütsür.

Guru J. Rongsennungba Jamir sempet tajung alima asoshi tajangzük südakjang aser pa wadang ajak takok manung Tsüngremi len aniang ta club sanger sarasadem.

Sd/-  
Wb. Temjenyongba  
President, LCC

Sd/-  
Wb. Tongpangkokba Pnr.  
Gen. Secy. LCC

## AR-i teyari maparen balala ayongzüka inyak

**Dimapur, Chiteni/July 7 (TYO):** HQ IGAR (N) kübok Assam Rifles Kiphire Battalion-i, Tuhinkiu yimtsüing nung medical checkup camp ka ayongzüka katsüogo. AR-i COVID 19 dak sendakba nung tangazükba agütsüba den yimdaklirtem temang anepalutsüogo aser mozü dena lemja liasü. Medical camp nung yimdaklirtem aika tajangzük nguogo aser parnokia Assam Rifles dang kanga pelaba lemsatepa liasü.

Kasa mapang nung Kiphire Battalion-isa, PHC Moya den longjemer Khongjiri yimtsüing nung July 7 nü vaccine agütsüba sentong ka ayongzüka katsüogo. Mimi yimtsüing nung alir 60 nem vaccine mezüngbuba dose agütsüogo aser tang tashi nung yimdaklir 104 nungi 66 nem vaccine agütsüogo

Maneni Assam Rifles Jalukie Battalion-i, Civil Authorities den longjemer Peren District kübok Jalukie jila nung July 7 vaccine agütsüba

sentong tulu ka ayongzüka agiogo.

Corono virus tapu balala poktetba ajanga alima ajunga timtemtepba mapang ka nung jenjang ajak nung vaccine agütsüdar. Ajisüaka yimtsüing aser jila balala nung alirtemi vaccine agiba tajangzük ano mejangjai lir aser ibayongji vaccine agiba sentong ayongzüka agitsü kanga tongtibang. Anungji Peren District medical authority-i Assam Rifles dang Jaluki nung vaccine agiba sentong ka ayongzüka agitsü atema teyari meshia liasü. Teyari meshiba ama AR-i medical staff aser administrative support agüja liasü.

Vaccine agiba sentong ayongzüka agiba mapang nisung 98 nem vaccine aser medical tsütsü tanga teyari agütsüogo. Peren District medical authority aser local temi Assam Rifles mapa tajung asoshi parnok nem tenungsang agüja liasü.

## GPRN-i asükhu lemsatep

**Dimapur, Chiteni/July 7 (TYO):** Government of the People's Republic of Nagalim (GPRN)-i sangdong ka ajanga NSCN/GPRN Tatar, Regardson Shimrah July 7 nü asüba osang angazüka mang ayimba lemsatepogo. Pa Wung Tangkhul Region (WTR) kübok Peh yimtsüing nungi liasü. Pa Naga nung tenzüktsü atema 1993 küm bendanga agütsü.

Pai masü tashi Naga nung tasüita masetshi tenzükogo. Naga nung atema pai bendanga

agüja inyakba atema Naga nung puti otsü nung tetshitsü aser menungraa biletmettsü.

NSCN/GPRN-i asür Regardson Shimrah'er kinungertem den asükhu lemsateper aser mangyim tejashi mapang par kinungertem nem anisüngzük agüjang ta sarasademtsüba den asür tanüla teti tatem makadak anisüngzükdakjang ta sarasademtsüba MIP, NSCN/GPRN sangdong ajanga metetdaksü.

## ODI ranking nung Mithali Raj-i temaba jenjang ajangzükttet

**Dubai, Chiteni July 07, 2021 (Agencies):** Küm asem tashi cricket asaya tsütsü shilem tajung agia arur aser England den asaya asem series nung tanga asayar dang nungi junga asayaba sülen, Mongolbarnü, India skipper Mithali Raj-i tanaben 'women's ODI ranking' nung temaba jenjang tongtetogo.

India-i 1-2 agi iba series makok, saka arishi küm 38 tain Raj-i asaya asempronlga nung half-century yanglua liasü. Iba series mezüing ODI ana nung Raj-i run 72 aser 59 yanglu aser tasembuba asaya nung pai run 75 (not out) yangluba ajanga India team-i wicket 4 agi iba asaya koktet.

Item asaya asadanga, Raj-i jenjang pezü tashi ajateta ODI ranking' nung temaba jenjang tongtet.

2018 küm February ita lai tesüsa ODI ranking' nung temaba jenjang tongteta lir.

Potchefstroom nung New Zealand den World Cup asayaba mapang, Raj-i run 91 (not out) yangluba sülen, 2005 küm April ita lai mezüing ODI ranking nung temaba jenjang ajangzüktteta liasü. Küm 16 sülen lai ano tasembuba iba alizüing tongtetogo, koba tetsür cricket asayar rongnung iba ama jenjang aiben tongteter asayar aikabo mali.

1984 küm tetsür cricket



asayar rongnung, England tsür Janette Brittin-i mezüing ODI ranking temaba jenjang ajangzüktteta aser tesüsa 1995 küm laisa kasa jenjang tongteta liasü. Kasa mapang, New Zealand tsür Debbie Hockley-ia 1987 küm mezüing iba jenjang ajangzüktteta aser tesüsa 1997 küm lai iba jenjang tanaben tongteta lir.

India tsür opener Shafali Verma-i ODIs tatembuba ana nung run 44 aser 19 yanglua liasü; aser lai ODI ranking nung jenjang 71buba tongteta lir. Ano külen, fast bowler Jhulan Goswami-ia jenjang 53buba tongtetogo.

Kasa asayamung asaya tatembuba nung, all-rounder Deepti Sharma-i run 47 aguja wicket 3 agiba sülen, bowlers' list nung lai jenjang 12buba

ajangzükttet.

England atema, opener Lauren Winfield-Hill-i asaya ana tashi nung run 42 aser 36 yangluba sülen, ranking nung lai jenjang 41buba tongtogo. Kasa mapang, Sophia Dunkley-ia run 73 (not out) aser 28 yangluba sülen, jenjang 76buba tongtogo.

Left-arm spinner Sophie Ecclestone-i maneni shilem tajung agia, lai wicket 3/33 aser 2/36 agiba sülen ranking nung jenjang trokbuba ajangzüktteta lir. Tanabuba match nung, Kate Cross-i wicket 5/34 agiba atema ranking 25th nungi la 18buba tashi tuogo. Nat Sciver aser Sarah Glenn naprongla ranking 22buba aser 43buba tongtetogo.

Women's T20I Player Ranking nung, Pakistan spinner Nida Dar, shibai T20I wicket 100 agia, Pakistan tsür rongnung iba alizüing tongteter mezüing asayar aküm, West Indies den asaya asem series nung wicket pezü agiba sülen, lai jenjang 16buba tongtogo.

West Indies tsür Shamilia Cornell-i jenjang 27buba aser captain Stafanie Taylor-i hat-trick den wicket 4/17 agiba sülen, la jenjang 42buba tashi tuogo. Fatima Sana-ia jenjang 94buba ajangzükttet.

Batting asayar rongnung Chedean Nation-i jenjang 61 aser Kycia Knight-i jenjang 71buba tongtogo.

## Euro 2020: Italy-i Spain koka Final tongtetogo



Euro 2020 soccer championship semifinal asaya nung takok ngur Italy nungi asayartem pelatepba noksa nung angur.

**Chiteni/July 7, 2021 (Agencies):** Euro 2020 semifinal nung Spain den penalty metsütepba sülen Italy-i takok ngua final tongtetogo.

Asaya mapang timbaka Spain-i amokbanger asaya aser Italy pur ball benschitsü atema maangka mangu, ajisüaka asaya tanabuba shilem nung Juventus winger Federico Chiesa-i Italy atema goal ka idakja parnok tejakdang aküm.

Mezüingbuba goal idaktsüba sülen minute 20 dang lir minute 80buba nung Alvaro Morata-i Spain atema goal ka idakja goal kasasa aküm. Iba sülen Spain puri goal idaktsütsü atema maneni nongshia asaya saka atakzükja aliba mapa tembangba sülen mapang apuloktsür asayaba mapang tashi nunga telok kati danga goal midaktsüteti asaya tembang.

Takoker bendangtsü atema team ana tsüingda penalty metsütsüsa aküm aser penalty metsütepba mapang Italy atema Manuel Locatelli-i mezüingbuba metsü saka Spain goal keeper Unai Simon-i kanga junga nokdang, ajisüaka Spain nunger asayar Dani Olmo-i goal midaktsüteti metsüdok.

Italy atema tanabuba penalty Belotti-i aibelene mesüi idaktsü aser kasaji Spain atemaa Thiago-ia goal idaktsü.

Italy atema tasembuba penalty Federico Bernardeschi-i metsü aser pai goal idaktsü ajisüaka Spain

asoshi Alvaro Morata-i metsüba ball Italy goal keeper Gianluigi Donnaruma-i nokdanga liasü.

Iba sülen Italy atema takok asoshi Chelsea midfielder Jorginho-i penalty metsütsü ata aser pressure nung pai kanga süngjema goal idakja parnoki asaya akok.

Wembley nung asayar repranger 66,000 matsüingdang Jorginho-i kanga süngjemshir Italy asoshi deciding aser penalty pongububa idaktsü aser par team final-i ani. Arishi küm 29 tain asayari penalty kanga süngjema metsüba ajanga fan tema kanga süngmanga liasü.

"Asaya kar nungbo kangshitsüsa akümer. Asaya ajak ayong ayongadangbo masayatetsü. Asaya metenzük dang nungi kanga toktepa asayatsü ta meteter liasü," ta Italy coach Mancini-i ashi.

"Ibayongji küm asem tashi onok den kanga meranga inyakertem aser asayartem nem tenüngsang agütsütsü langa lir, kechiyong asaya temela masü asü. Nüburtem timba kati onoki asaya akoktsü ta imlaa maliasü saka onok final tongtetogo," ta paisa ashi.

Deobarnü Final nung Italy, Denmark mesera England den asayatsü, koba 2012 küm final nung goal 4-0 agi Spain makokba sülen mezüingbuba final asütsü aser 1968 küm takok anguba sülen tang mezüingbuba European Championship akoktsü merangtsü.

## Argentina-i penalty ajanga Colombia koka Copa Final togtetogo



Copa America semifinal asaya nung Argentina nungi asayar Lionel Messi (10) aser külem asayartem Colombia madak takok ngur pelatepba noksa nung angur.

**Chiteni/July 7, 2021 (Agencies):** Copa America semifinal nung penalty ajanga Colombia akokba asaya nung Goalkeeper Emiliano Martinez ya Argentina tekümzükter liasü aser pa teyari nung Mongolbarnü Brazil den final asayatsü atema maangka ngutetogo.

Brasilia nung asaya goal kaka agütsür tembangba sülen Argentina goal keeper Martinez-i shoot-out nung penalty asem tashi nokdanga par team takok dangi ani.

Kasa mapang nung asayamung ayongzükba linük Brazil-i Hombarnü goal 1-0

agi Peru madak takok nguogo aser iba tetezü nungtugu asayar Neymar aser par team Lionel Messi-i aniba Argentina team den Honibarnü final asayatsü.

Küm ana tejakdang Brazil-i semi-finals nung Argentina tsükdaktsü aser Copa title tekububa kokteta liasü.

Arishi küm Messi 34 tain Messi atema par national team nungi international title ka akoktsü atema mapang kanga ajema kümdar. Taoba mapang parnok Copa finals asem aser 2014 World Cup final nung tamakok nguogo.

Asaya tenzükter minute

tenetbuba nung Messi-i teyari agüja Lautaro Martinez-i mezüingbuba goal idaktsü ajisüaka Colombia atema Luis Diaz-ia goal ka idakja kasasa aküm.

Penalty metsütepba mapang goalkeeper Martinez-i, center-backs Davinson Sanchez aser Yerry Mina aser midfielder Edwin Cardona nungeri metsüba penalty nokdanga liasü.

Argentina atema Rodrigo De Paul-i penalty midaktsütetaka goali daktsürtem rongnung Messi-a densema liasü aser parnoki goal 3-2 agi takok angu.

## BILEMDANGANG

"Nai mapa tajung minyaktetra tangara tenokdang."